

## Helderberg Lente Toer

### **Bygewoon deur:**

Peet, Marjorie & Johan Hugo

André & Vinkie Swanepoel

Gawie en Madeleen Smith

### **Gedeeltelik mee gemaak:**

Bennie & Annalene van Niekerk

Koos & Erina van Wyk

Pieter & Zaan Brink

Hierdie toer is saamgestel deur Peet Hugo en het al die logistiek en reëlings hanteer, met die hulp van Marjorie. Die lede van Helderberg het ook hand by gesit met inligting en voorstelle.

**Kilometers afgelê:** 1836

**Bande geruil/herstel:** 3

**Nasionale Parke besoek:** 2

Die toer het begin op Vrydag, 17 September, waar die Hugo's, Smith's en Swanepoole bymekaar gekom het by De Hollandsche Molen. Die wind het ons moedeloos gewaai, maar vure sal ons aansteek. Dit was 'n woelige aand, maar ons het heerlik ontpsan en gebraai.



Om 9:00 vertrek die 3 miskruiers uit De Hollandsche Molen en die eerste stop is by die Shell N1 Worcester, waar Bennie en Annalene by ons aansluit. Bene rek, brandstof en die nodige 'pit stop' word afgehandel, waarna ons weer in die pad val.

Om 10:55 stop ons by die Veldskoen padstal en word deur 'n geniepsige koue windjie, met sneeu op die bergpieke, getrakteer. Konfyt, droëvrugte, neute en allerhande lekkernye vind hul weg in ons mandjies



Innerlik versterk, met ligter beursies, maak ons soos beesmis en val in die pad na Maatjiesfontein.

By die Laird's Arms Pub word ons gul ontvang deur Kelly en Johnny, waar ons 'n heerlike middagete geniet. Daar is 'n vasgestelde spyskaart met 'n keuse van 3 heerlike warm disse. Springbok Burgers, Lamskerrie en Stokvis met skyfies. Flinke diens, met lewendige musiek deur Johnny, maak dat ons met groot glimlagte weer kan voort ry na Sutherland. . . Nadat ons die koninklike spookhuis, klassieke antieke voertuie, die tuine om die hotel en 'n kykie na kapkarre en waens kon kry.



Die pad na Sutherland is glad nie so sleg nie, net bietjie smal. Die natuurskoon is regtig besonders en ons kon die windplaas baie mooi sien. Jurg Wagenaar by Sterland, het ons vriendelik ontvang en gou-gou het ons almal 'n staanplekkie, asook die uitsluitlike gebruik van 'n Muisboslapa. Na 'n heerlike braai saam het ons die Sterre Praatjie deur Jurg gaan bywoon. Dit is voorwaar 'n skouspel om die sterre van naby te kan beskou. Die hele toer verder kon ons die bakens in die hemelruim uitwys en geniet



Sondagoggend vroeg val die meeste manne in die pad met Peet se Krokodil en gaan ry die Ouberg pas. Deur die Tankwa en vele grondpaaie, geniet die manne die uitdaging saam. Marjorie het roosterkoeke en versnaperings ingepak, wat hul op die eskarpmnt kon geniet. Bennie het nie lekker gevoel nie, en het besluit om liever te rus dieoggend.



Ons was ook by die Ou Meul restaurant inbespreek vir die plaaslike lekkerny – Skaapkop!! Die manne het omtrent gewy daaronder, terwyl die dames veel eerder iets anders probeer het. Butternutsop, Hoender Schnitsel en Lamskenkel het hul weg oop gesien na ons. Van ons lede het die area bietjie gaan verken en ook gaan kyk hoe lyk dit by die Salt Teleskoop en koepels. ‘n Rustige, vroeë aand volg, en ons maak gereed vir die volgende dag se vertrek na Beaufort Wes.

Na 'n heerlike ontbyt, pak ons op, en vertrek. Ons was so effe opgehou deur 'n massiewe trop skape voor die N1 afdraai, maar het steeds pret gehad.



Op Laingsburg koop van ons roosterkoek by tannie Poppie, vul brandstof aan en rek bene. Naby die Hexrivierpas bars Gawie en Madeleen se woonwawiel. Twee verkeersvoertuie stop agter en herlei die aankomende verkeer vir ons. Vinnig-vinnig, met almal se hulp en almal se gereedskap word die wiel geruil. Vandaar word Johan "die Wiele man" gedoop en onmiddellik word betaling vasgestel met "spys en drank". Sonder verdere skade ry ons voort na Leeu Gamka. Vinnige bene rek en spens aanvul, en ons ry verder.




Gawie en Madeleen hou verby Karoo Nasionale Park en laat herstel gou die wa se bande in Beaufort Wes en vind toe ook een van Madeleen se verlore niggies. Die res van ons gaan kamp toe, sluit aan by Koos en Erina, slaan solank op en skrop nes. Na 'n kort ruskansie, begin die eerste verkenning van die park en van ons ry die Klipspringer pas. Die park is baie droog, maar daar is steeds baie wild te sien.



Karoo Nasionale Park is 'n ou gunsteling van die Hugo's en ons het ook Dinsdag en Woensdag aangewend om die 4 x 4 paaie te ry.



Dit was heerlik warm bedags, maar koel snags. Bennie en Koos'le het vroeër aangestoot na Oudtshoorn. Koos'le na familie verpligte en Bennie om by 'n mediese sentrum te kom. (Na oorlegpleging met sy mediese span, is Bennie aangeraai om so gou moontlik in die Kaap te kom, sy gesondheid is nie na wense nie. By skrywe hiervan was Bennie steeds in Panorama Mediclinic, stabiel, maar ernstig siek. Ons gebede is met julle Bennie en Annalene.)



Donderdagoggend gaan almal behalwe Marjorie na die Salt & Pepper restaurant, van die Karoo Nasionale Park, vir 'n heerlike ontbyt. Ons vertrek en stop by 'n paar interessante Padstalle. Boeteka padstal met baie ou implemente en lekker fudge, en Silver Padstal, met 'n Windpomp, wat onmiddellik deur Johan uitgeklim word. Heerlik met die plaaslike mense gesels.



Deur die Meiringspoort het ons gestop by die waterval uitkykpunt. Die geriewe hier is baie netjies en goed onderhou. Hier het Marjorie haar hoogtepunt en laagtepunt op dieselfde plek beleef. Berge uit geklim saam met Johan en trappe na benede geklits. Genadiglik geen ernstige beserings opgedoen nie.



Oudtshoorn deur, waarna ons by Ladismith by die Kaas fabriekswinkel aandoen en kaas, joghurt, vrugtesap en Steristumpies aanvul. Johan glimlag breed. Ons ry verder en stop by Ronnies Sex Shop vir fotos.



Middagete geniet ons by Diesel en Creme in Barrydale. Daar ondervind ons dat meer as halfde van die besienswaardighede weens die Pandemie in die slag gebly het. Ons ry verder, oor die Tredouxpas na Swellendam. Pragtige fynbos is langs die pad te sien en ons ry deur die klein nedersetting – Zuurbraak – waar die kinders en honde nog in die pad speel en die plaas trekkers en bakkies die grootpad deel.



Moeg kom ons by Bontebok Nasionale Park aan, en kry gou 'n rusplekkie vir ons waens. Nou was dit André en Vinkie se wa wat 'n pap wiel het. Die nodige word gedoen en weens die vakansiedag, moet die wiel Saterdag herstel word. Saterdagoggend is Gawie se bakkie se band ook pap. Dis ook genadiglik vinnig herstel.



Die park het nie vreeslik baie wild nie, maar is ryk aan voëllewe, 'n visvang mekka en baie mooi plantegroei. Hierdie park is nie vreeslik bekend nie, maar gaan verseker weer deur ons besoek word. Ons het regtig die rustigheid geniet daar.



Vrydag het Madeleen se suster en swaer, Pieter en Zaan Brink van Rawsonville by ons aangesluit. Lekker saam gekuier. Die naguiltjies se serenade het ons heel naweek snags bekoor – volgens sommige van ons meer gehinder – daar het ook ‘n mongoose op die tafels gedans snags. Soggens was dit mistig, maar pragtig. Saterdag is die Hugo’s en Swanepoele na Malgas Pont. Oppad stop ons by ‘n ou paartjie in ‘n wit Golfie, in nood, hulle domkrag is gebreek. Johan die Wiele Man spring weer uit en doen die nodige.



Ons sien baie Bloukraanvoëls wat uit die vee se drinkbakke kom water drink. Drankies geniet in die Malgas Hotel, waarna ons na Buffelsjagsfontein BP gery het vir gevulde roosterkoeke vir middagete.



En so kom die heerlikste toer tot ‘n einde. Sondagoggend is die Brink’s eerste op pad terug, waarna die Swanepoele vertrek het. Die Hugo’s is daarna oppad, groen van jaloesie, want die Smith’s rek die vakansietjie met nog ‘n dag.

**Die algemene konsensus** – Sterrekyk was ‘n wenner, Skaapkoppe sou nie gebeur het as dit nie vir die toer was nie, die Pont sou nie besoek geword het as dit nie vir die groep was nie en beide Nasionale Parke is sommer bo aan almal se toekomstige besoek-lysysies geplaas.